

豫

章

叢

書

第十二册



周官集傳

己未仲夏刊
於南昌退廬

欽定四庫全書總目卷十九

經部·禮類一

周官集傳十六卷

永樂大典本

元毛應龍撰案張萱內閣書目稱應龍字介石豫章人大德間嘗官澧州教授而江西志乘俱軼其名始末已不可詳考矣是書於諸家訓釋引據頗博而於鄭鑿之解義徐氏之音辨及歐陽謙之之說所采尤多其自出已意者則題應龍曰以別之其中有沿襲誤說未考古義者如鍾師掌金奏以鍾鼓奏九夏杜子春鄭康成皆以九夏爲樂曲而應龍獨引歐陽謙之說謂左

傳襄四年曰金奏肆夏之三工歌文王之三文
王而曰工歌是有詩而可歌者也肆夏而曰金
奏是徒有其聲可以金奏而無詩可歌明矣今
考孔穎達左傳疏云作樂先擊鐘故稱金奏此
晉人作樂先歌肆夏肆夏是作樂之初故於肆
夏言金奏也次工歌文王樂已先作非復以金
爲始故言工歌也其說足與鄭注相發明如以
九夏之文統金奏之下卽以爲非樂曲則鍾師
又有凡射王奏騶虞諸侯奏貍首卿大夫奏采
蘋士奏采芣之文貫於金奏下豈亦均非樂曲

乎又甸祝禩牲禩馬鄭註禩讀如伏誅之誅今
侏大字也爲牲祭求肥充爲馬祭求肥健也應
龍亦主謙之說謂禩稠也禱牲禩盛也以康成
改讀爲非考禩侏二字古音本通非康成改讀
揚雄國三老箴負乘覆餗姦寇侏張晉書慕容
垂載記苻堅報書曰侏張幽顯魏書恩倖傳侏
張不已北齊源彪傳吳賊侏張侏張卽禱張侏
與禱猶侏與禩音同故義借安得指爲康成改
讀乎又卓氏爲禩應龍引鄭鍔之說曰晏子謂
六斗四升爲禩管子謂百升而成釜康成則謂

四升曰豆四豆曰區四區曰釜爲六斗四升以
下文觀之其臀一寸其實一豆豆當爲斗釜之
臀一寸而容一斗則釜之內方一尺而容十斗
無可疑者十斗則百升正管仲所謂釜也康成
謂四升曰豆每四而加故區至釜而六斗四升
彼殊不考之於梓人也梓人爲飲器爵一升觶
三升獻以爵而酬以觶一獻而三酬則一豆矣
夫一獻則一升矣三酬則九升也以一合九非
十升爲豆而何而康成謂四升爲豆失之矣今
考康成謂觶六斗四升實據經文方尺深尺以

粟米法算之蓋粟米法方一尺深一尺六寸二分乃容一石鏹以黼容一石則是黼方尺深尺六寸二分矣其何以解於經文方尺深尺耶管子海王篇鹽百升而釜房元齡注謂鹽十二兩七銖一黍十分之一爲升當米六合四勺百升之鹽七十六斤十二兩十七銖二釁爲釜當米六斗四升則是海王篇百升之釜乃實百升之鹽非實百升之粟也今鏹以管子量鹽之黼爲臬氏量粟之黼比擬已爲不倫至於康成注梓人以豆爲斗實以豆止四升不及一獻三酬之

數鍔誤以豆爲飲器遂牽合十升之文反詆改
豆爲斗之非不知古以斗飲不以豆飲詩行葦
篇毛傳曰大斗長三尺戰國策曰令工人作爲
金斗長其尾與代王飲卽因反斗擊之此斗爲
飲器之證也越語曰觴酒豆肉韓子外儲篇曰
取一豆肉是豆實食器而非飲器之證也又安
得引梓人之文爲管子之旁證乎諸如此類皆
未免膠執舊文疎於考核至於冕服車旗之度
廟祧昭穆之制司尊彝之六尊六彝司几筵之
五几五席方弓義弓之異名正歲正月之並用

條例引證頗爲明晰宋以來諸家散佚之說尙因是以存其崖略則蒐輯之功固亦非尠矣其書諸家著錄皆云二十四卷今散見於永樂大典者地官夏官適當闕帙其餘四官首尾頗爲完具謹錄爲十六卷以一官四卷共得二十四卷計之仍其舊第也應龍所著別有周官或問五卷在集傳之外永樂大典割附集傳之後其存者僅天官十九條春官十四條秋官冬官各一條篇幅寥寥不能別成一帙今仍附於各傳下旣免以畸零散佚且使一家之說互相參證

亦足以資發明焉

周官集傳卷一

元 毛應龍 撰

天官冢宰第一

宰者主治之名天下萬事無一不出於天天有是事人有是官凡有職位皆所以代天治事冢宰總六官之事無所不統故稱天官李氏曰古人位曰天位工曰天工職曰天職自有深意

惟王建國辨方正位體國經野設官分職以爲民極惟專辭也首稱惟王示天下後世尊歸天子之義劉氏曰天子作民父母以爲天下王謂命之王也

國王者所都劉氏曰能使四方諸侯朝宗觀遇奔走以聽命者王者所以國也國中九里九經九緯之制卽野中九夫爲井之制一夫九里爲井之制卽提封九百萬夫之比之制四海之內放之而準國有體而野有經須立官以治民使民得其中正設官謂設天地四時之六官分職謂分治教禮政刑事之六職極者至極之義標準之名如北辰之爲天極屋棟之爲屋極常在屋之中央而四外望之以取正焉者此所謂民極卽詩所謂立我蒸民莫匪爾極洪範所謂汝極君牙所謂惟爾之中皆

是也昔武王克商受命首訪九疇遷九鼎以定都
洛之大計成王周公嗣守文武大訓作新大邑於
東國洛卿眡土圭匠用水縣晝參日景夜考極星
辨方正位法天道也體國經野順地道也設官分
職以爲民極立人道也此周公制作萬世不能越
自惟王以下至民極凡五句六官之首同此序文
何同乎此也尊王也

乃立天官冢宰使帥其屬而掌邦治以佐王均邦國
立者設其官使者授其職帥如子帥以正之帥邦
王國也經中凡單言邦單言國者王國也連言邦

國者諸侯國也王者之道有先後本末之序無遠近之私近者治而遠者不治非均也書曰無偏無黨王道蕩蕩無黨無偏王道平平無反無側王道正直所謂均也上云掌邦治尊得以統卑下言均邦國外可以包內王國所先侯國所後掌主爲本均平爲末六卿分任天地四時之官十二小卿應十有二月三百六十官之屬上當三百六十五度周天之數下應三百六旬有六日成歲之功而皆統於天官冢宰鄭注云象天者蓋謂此也

治官之屬大宰卿一人小宰中大夫二人宰夫下大

夫四人上士八人中士十有六人旅下士三十有二人府六人史十有二人胥十有二人徒百有二十人大宰者對小宰爲文也如司徒以下各著大小二字於官名之上冢旣訓大若稱大冢宰則文義複重又無緣以小宰爲小冢宰宰者主治之名故止曰大宰小宰此經中變文之例餘各以尊卑爲倍差劉氏曰府掌治典之籍史掌治書之札王氏曰有藏則置府有書則置史有令之事則置徒有徒則置胥孟子所謂庶人之在官者一人胥二人史一人正上士二人中士四人下士八人府二人史四人

胥四人徒四十人

宮伯中士二人下士四人府一人史二人胥二人徒二十人

陳士曰小宰中大夫治王宮之政令先王之治自內以及外自宮中以及朝廷及邦國自宰夫以下卽敘宮正宮伯二官掌諸官府之在王宮者掌宮中之徒役掌貴游子弟宿衛王宮者 宮伯爲宮正之貳正猶帥正之正伯猶伯仲之伯

膳夫上士二人中士四人下士八人府二人史四人胥十有二人徒百有二十人

庖人中士四人下士八人府二人史四人賈八人胥
四人徒四十人

庖人膳夫之佐主辨名物故有賈八人辨名物者
莫善於賈史之下次之以賈

內饗中士四人下士八人府二人史四人胥十人徒
百人

外饗中士四人下士八人府二人史四人胥十人徒
百人

饗有內外面而皆統於膳夫

亨人下士四人府一人史二人胥五人徒五十八

甸師下士二人府一人史二人胥三十人徒三百人
獸人中士四人下士八人府二人史四人胥四人徒
四十人

敝人中士二人下士四人府二人史四人胥三十人
徒三百人

鼈人下士四人府二人史二人徒十有六人

春獻鼈蜃爲互物之首故以名官

腊人下士四人府二人史二人徒二十人

腊從昔從肉言肉久而乾也

醫師上士二人下士四人府二人史二人徒二十人

醫能知五運六氣以飲食之屬養性養形却疾故
在飲食官之間

食醫中士二人

食醫掌調和飲食之齊當與膳夫爲屬謂爲醫也
故次醫師

疾醫中士八人

瘍醫下士八人

若今之外科醫

獸醫下士四人

酒正中士四人下士八人府二人史八人胥八人徒

八十人

酒誥曰有正有事釋者曰正酒正也事羣吏之服其事者

酒人奄十人女酒三十人奚三百人

酒人之下疑有闕文奚賤者之稱唯其有宮中之役故有奄有女酒有奚下倣此 王氏曰奄者蓋

民之有是疾先王因擇而用之與籛篠蒙鏐戚施

直罇聾聵司火瞽矇修磬同 應龍曰籛篠本疾名晉語曰籛篠不可使

俯戚施不可使仰鏐弩眉也金之美者罇鐘鱗也鐘上橫木木上金葉

漿人奄五人女漿十有五人奚百有五十人

漿人六飲官入於酒府者以酒正當奉之故也

凌人下士二人府二人史二人胥八人徒八十人

籩人奄一人女籩十人奚二十人

女籩女奴曉共籩實之事者木豆爲豆竹豆爲籩

瓦豆爲登籩宜乾物豆宜濡物 聶氏禮圖云案

士虞禮注云籩以竹爲之有滕緣形制如豆亦受

四升盛棗栗梅桃菱芡脯羞臠鮑糗餌之屬有巾

聶氏巾圖說籩中用紵被纁裏圓一幅

醢人奄一人女醢二十人奚四十人

醢人奄二人女醢二十人奚四十人

鹽人奄二人女鹽二十人奚四十人

冪人奄一人女冪十人奚二十人

宮人中士四人下士八人府二人史四人胥八人徒八十人

劉氏曰宮人掌其修潔者亦用士人焉應龍曰古者燧人王而始庖割軒轅帝而始棟宇故飲食居處之事雖並陳而先後有序

掌舍下士四人府二人史四人徒四十人

幕人下士一人府二人史二人徒四十人

掌次下士四人府四人史二人徒八十人

大府下大夫二人上士四人下士八人府四人史八人賈十有六人胥八人徒八十人

賈善辨物及蓄藏之事

玉府上士二人中士四人府二人史二人工八人賈八人胥四人徒四十有八人

賈知玉者

內府中士二人府一人史二人徒十人

外府中士二人府一人史二人徒十人

司會中大夫二人下大夫四人上士八人中士十有六人府四人史八人胥五人徒五十人

東萊呂氏曰自大府至外府掌府藏財賦自司會至職幣掌會計財賦故大府爲府藏官長以下大夫爲之司會爲會計官長以中大夫爲之權勢足相檢括不得爲姦利也歐陽謙之曰自大府至外府財貨之所在而主藏者也若宋監左藏庫官是矣自司會至職幣貨財數目多少之所在而主計者也若宋戶部是矣後世通謂之九府豈考之不詳而相襲以爲說乎

司書上士二人中士四人府二人史四人徒八人

職內上士二人中士四人府四人史四人徒二十人

職歲上士四人中士八人府四人史八人徒二十人
職歲主出歲者以歲斷

職幣上士二人中士四人府二人史四人賈四人胥
二人徒二十人

古文幣與弊通謂事止功就而財有餘

司裘中士二人下士四人府二人史四人徒四十人
當是冬官裘氏之長

掌皮下士四人府二人史四人徒四十人

內宰下大夫二人上士四人中士八人府四人史八
人胥八人徒八十人

王內官之長 陳君舉曰嘗讀關雎知三代而上
后妃極天下之選矣則宮掖之政一以聽之所爲
奚不可者今迺內小臣而下凡闈官九嬪而下凡
婦官下至於女奴曉祝者曉書者曉裁縫者必屬
之大臣則夫員數之增損職掌之廢置祿秩之多
寡賜予之疏數皆稟命於朝廷而后不與且使內
宰得以稽其功緒而賞罰其勤惰苟違有司之禁
雖天子不能自以爲恩是故私謁不行而內政舉
古之所謂正家者蓋如此而非屑屑然也今出房
闈而力較是非於侵紊之後爭予奪於縱弛之餘

抑未矣漢太尉楊秉糾中常侍而尙書詰以三公
統外安得越奏近官蓋內治不聽於公卿大夫矣
無怪乎後世之多亂也歟

內小臣奄上士四人史二人徒八人

稱上士者食其祿也曰內小臣者別夏官之小臣
闈人王宮每門四人囿旂亦如之

刑人於守門則有之謂闈人則未詳以地官司徒
守國門者下大夫二人又有上士中士下士之屬
豈宮門嚴近而無官有司之職乃屬於刑人此於
官名之下不見大夫士之官者當有闕文或是每

門四人者爲之長刑人者爲之役也園如王者靈
園之園游游幸之所

寺人王之正內五人

內豎倍寺人之數

九嬪

嬪賓從之義

世婦

鄭鏐曰名世婦者亦以廣嗣之路

女御

鄭鏐曰女御八十一人經亦不言數其義亦如世

婦

女祝四人奚八人

女史八人奚十有六人

毛氏詩註曰古有女史彤管之法 鄭鏞曰古者

天子有史官左記言右記動故爲天子者不敢有
過舉王與后同體言動不謹則家道不齊無以舉
天下之內治故有女史掌彤管之職

典婦功中士二人下士四人府二人史四人工四人
賈四人徒二十人

典絲下士二人府二人史二人賈四人徒十有二人

典冢下士二人府二人史二人徒二十人

內司服奄一人女御二人奚八人

縫人奄二人女御八人女工八十人奚三十人

染人下士二人史二人徒二十人

追師下士二人府一人史二人工二人徒四人

廛人下士二人府一人史一人工八人徒四人

夏采下士四人史一人徒四人

大宰之職掌建邦之六典以佐王治邦國

張氏曰周禮惟大宰之職難看蓋無許大心胸包

羅記得此復忘彼其混混天下之事當如捕龍蛇

搏虎豹用心力着方可 建立也謂立國以來之
典故也在朝廷曰經謂常所秉執以理天下也在
邦國官府曰法謂常所守以爲法式也其目則治
教禮政刑事總言其書曰六典按六典八法八則
九賦九式九貢九職大宰所掌大史所書司書所
藏小宰司會有其貳他官各共所守不出乎六典
之中佐者相左右也治者總教禮政刑事之法隨
事施宜或損或益故爲六官之首大宰之事于氏
曰宰者濟其清濁和其剛柔而納之中和者此之
謂也 呂氏曰周官三百六十綱目盡在六典宰

相之職乃天下事之總統會要處也 陳氏曰六
官各有典夏書曰政典蓋從來久矣傳有秋官九
刑大司馬法之類皆周六典也藝文志司馬法百
五十五篇初劉歆以入兵家班固出之以爲軍禮
固之說是也今所存五篇 朱氏曰考工記卽事
典也 應龍曰禮典恐卽是儀禮今儀禮相傳爲
周公作韓子曰儀禮行之於今者蓋寡然文王周
公之法制粗在於是刑典如呂刑中所言是其概
也

一曰治典以經邦國以治官府以紀萬民

萬民侯國之萬民此三者治法之大節目有經則有緯陳大猷曰經如今機織家先立絲以爲之經有綱則有紀司馬溫公曰若網之有綱若絲之有紀應龍曰經邦國者九有碁布於外經之使不易其常紀萬民者細民絲紛於下治之而不遺其小言紀則於經爲詳也官府者王國之官府治之所從起也先言邦國次言官府明諸侯國亦各有官也天子曰兆民諸侯曰萬民舉外以包內也

二曰教典以安邦國以教官府以擾萬民

安者使安其分得其所教則授之以爲治之意使

之習熟於告戒然後施之事者無悖擾如擾龍之
擾馴伏其性而調順之

三曰禮典以和邦國以統百官以諧萬民

諧如八音克諧蓋八音清濁大小其音不同

四曰政典以平邦國以正百官以均萬民五曰刑典
以詰邦國以刑百官以糾萬民

刑者聖人不得已而用之所以禁止其惡毆而之
善也糾割也察也刑百官如刑於四海之刑所謂
士致百姓於刑之中也三山陳氏曰刑者特隄防
之具爾鄭鏐曰萬民有過懼其積小以致大必糾

其纖微無使藏姦匿惡以致於亂

六曰事典以富邦國以任百官以生萬民

事者度地居民興事造業民日用之生生不窮如
十三卦聖人制器之類通變宜民衛文公務材訓
農通商惠工馴致殷富又曰周官一書全只以典
爲本理財雖以九式爲要而九式亦不出乎六典
之外

以八法治官府

典法則式其義皆相附近典包法則式之事法則
式各得典之一義以者施用之名八法者官屬官

職官聯官常官成官法官刑官計也治者舉辦會聽經正糾弊也官府見上注又按諸解以此八法之目卽小宰所掌六屬八成之類名同而實非也小宰所掌乃此八法之貳

一曰官屬以舉邦治

屬者系屬如物相系屬則可舉舉者有所秉執而興起之也書曰各帥其屬凡建官則設屬以佐之以小傳大以卑隸尊脉絡貫通無不舉者

二曰官職以辨邦治

鄭鍔曰官雖設屬必有分職之法則邦治可辨蓋

庖人雖不治庖尸祝不越尊俎而代之官各有職則責各有歸治不患其無辨也應龍曰職專事治如日辨色

三曰官聯以會官治

大宰統百官均四海故有官聯以會官治聯者總衆異以爲同會者合萬殊而爲一自有衆賢肅和同寅協恭氣象

四曰官常以聽官治

歐陽謙之曰官常一官之常職任一官之事者守其一官之職待夫事之屬於本職者然後以其職

而治之此所謂以聽官治王氏曰八法惟官聯官
常曰官治者以官之聯事官之常數特言一官爾
故不言邦而言官也

五曰官成以經邦治

經者一定不易之名事至視已成之式以成其事
物至視已成之式以成其物謂之成憲有司依據
而行者也

六曰官法以正邦治七曰官刑以糾邦治八曰官計
以弊邦治

官刑卽書所謂制官刑倣於有位糾者割制之使

不爲非察舉之使不敢慢

以八則治都鄙

法如衡之有權則如尺之有度三山鄭氏曰法有

變有通欲得其平則立爲定式使之取則應龍曰

稍地曰家邑

大夫之采

縣地曰小都

六卿之采

置地曰大都

三公之采

家邑以處大夫及王子弟之封邑視大夫者

縣邑以處卿及王子弟之封邑視卿者大都以封

公及王子弟之封邑視公者家邑附內縣都附外

此八則者治都鄙之法也故秋官有都則之職掌

都家之八則春秋傳曰有先君之主曰都謂其始

封之君也 鄭鍔曰都鄙之於王國譬之一家戶
庭之於堂室也爲父兄馭子弟之術不過立爲準
式使之取則王者之於都鄙殆亦然爾以其有先
君之主故曰都以其在王畿之鄙故曰鄙其地不
出王畿之外非如邦國諸侯得以自治其國故王
朝立施設之則使之事事取則於此焉

一曰祭祀以馭其神

祭祀者其先君社稷五祀所食也大宗伯頒祀於
邦國都家鄉邑都宗人掌都祭祀之禮此有其則
不可以僭瀆不可以怠廢馭者馴而納之於善謂

調習之使各由其所當行之路而不出於法度之中也歐陽謙之曰馭蓋制馭之意所謂馭其神非所以施之於神所以制馭夫都鄙之君所以事神之道

二曰灋則以馭其官

歐陽謙之曰有都鄙之主則有官屬其屬有其長得自除者有必待朝廷除者兼品秩祿廩之厚薄員數之多寡皆須爲之定法乃馭其所以處官職之道也

三曰廢置以馭其吏

或因病而建置事畢省廢皆不使至於冗濫故謂
之馭吏羣吏也庶人之在官者 歐陽氏曰都鄙
之長雖曰畿內諸侯然猶王所自治如都宗人都
司馬家司馬朝大夫都則都士家則家士皆王國
自命之與畿外不同夫內之官府察其人而廢置
之其權可不在王國乎

四曰祿位以馭其士

祿田祿位朝位 歐陽謙之曰學士卽卿大夫之
子卿大夫卽都鄙之長取其子弟之有賢能精學
業者而擢用之此成周教胄子之本意也或問八

則祿位以馭其士鄭司農注士學士也其說似拘
如何曰士以祿位言固難一概論按夏官司士之
職掌羣臣之版賈氏謂羣臣者畿內朝廷及鄉遂
都鄙諸臣故陳氏云凡以道藝仕於國者不以貴
賤總謂之士始附於版者士也故曰司士又按官
伯掌王宮之士庶子凡在版者此所謂士乃公卿
大夫元士之適子庶子王氏曰庶子國子之未仕
者愚謂以士對庶則士爲已命者也此經馭其士
者都鄙之士也上文旣曰馭其官馭其吏此又曰
馭其士信乎爲都鄙言之則士者公卿大夫之子

而已

五曰賦貢以馭其用

九賦斂財之則九貢制用之則都鄙以十一之法
賦於民以四之一參之一之制貢於王而後得用
其餘而其用度亦又有則 歐陽謙之曰賦卽邦
縣邦都家削之賦是也貢卽閭師貢其物之類是
也都鄙之地食其公田之入卽所謂賦然豈無山
林川澤可以稅取者乎是所謂貢周人之法征其
米粟征其布縷征其力役惟關市有泉布及無職
者出夫布宅不毛者有里布外此未嘗取民以錢

也孟子亦謂有布縷之征力役之征而已而鄭氏
解九賦專引漢法以爲口率出泉不知所考而云
夫泉布者官所自鑄非民之所有也周人制賦惟
以民之所有不責其所無若角人齒角之物羽人
羽翮之政掌葛絺綌之材者皆使之以當邦賦是
可見也至關市有泉以交易則或征之其宅不毛
與凡田不耕與無職事者稍征其布以困苦之而
使無舍本趨末而已非征賦之本意也詎可以後
世之橫取而誣先王之仁政哉

六曰禮俗以馭其民

節文必因乎人情好尚不違乎禮制

七日刑賞以馭其威

鄭鏐曰當刑而刑當賞而賞必循乎賞罰之則應
龍曰刑賞忠厚之至洪範曰惟辟作威蓋此都家
之獄必上於國所以制爲所得用之刑賞而有其
則爾

八曰田役以馭其衆

田畝狩之總名役師徒之總名散而居曰民合而
興曰衆古者諸侯田不過三祭祀賓客充君之庖
役不過三凡一夫歲用其力三日上農夫食九人

可用者家三人所以立爲之限制使循吾田役之則也鄭鑄曰田役合民而用之故曰衆馭其衆則彼不敢非時而用衆

以八柄詔王馭羣臣

太宰八柄大臣之事與內史八枋有司之事不同大臣之事有揆度有司之事奉法而已鄭氏曰柄所秉執者王氏曰言操此以爲用也應龍曰馭者馭而納之於善羣臣受命於上有職位者大宰之職如六典八法八則之屬凡不言詔王者皆佐王所施行之事如八柄八統之屬凡言詔王者皆

冢宰常行之事但其目詔告於王也周官有官
府有羣臣有羣吏皆謂之臣官府則備一官爲卿
百官有司統焉羣臣則命士以上者之稱羣吏掌
於小宰乃庶人之在官者府史胥徒之屬

一曰爵以馭其貴

一命以上不與凡民齒貴也鄭鍔曰以爵爲貴其
柄在我乃所以馭之也

二曰祿以馭其富

有爵則有田賦吏民所以賦也鄭鍔曰以祿爲富
其柄在我乃所以馭之也

三日子以馭其幸

鄭氏曰子者賜予也鄭錡曰幸者人臣一時之遇也

四日置以馭其行

置者時有所建立之名行謂德之可見於行事者也

五日生以馭其福

王制弗故生也亦此義

六日奪以馭其貧七日廢以馭其罪八日誅以馭其過

周官集傳卷一
三
奪者繼爵削地收其田里之名此祿以馭其富之
反也

以八統詔王馭萬民

統猶綱也立于上而下自從焉

一曰親親二曰敬故

親謂父母兄弟宗族故謂舊老成人親親仁也敬
故義也親敬二字便是詔告於王以統馭萬民之
體要處論語曰君子篤於親則民興於仁故舊不
遺則民不偷

三曰進賢四曰使能

進者推舉而登進之使者稱其能而任之賢者能者凡民平日所景慕而從之者也

五曰保庸六曰尊貴

以其嘗有功於民能保民者故保安之尊貴者天下有達尊三爵一是也此二者民之望也

七曰達吏八曰禮賓

達先之也吏有司也語曰先有司吏者承流宣化道民情者也書曰臣爲上爲德爲下爲民賓異於常人者以禮禮賓之如先代之後及故舊先哲杞宋與箕子商容之屬考大宰職首至以富得民

又當分兩節看六典八法八則八柄八統是掌邦
治之事爲一節九職九賦九式九貢九兩是制國
用之事爲一節上一節六典爲要其緊處在八統
下一節九式爲要其緊處在九兩八統九兩皆歸
宿於民民者邦本

以九職任萬民

萬民諸侯國之萬民舉外以見內陳君舉曰天之
生民未有無能而養者能其事而後可以養無事
而食衆之殃也故聖人制天下之民各從其能以
服於事大宰旣任之職間師又責其功故曰無職

事者出夫布也王制瘖聾跛躄斷者侏儒百工各以其器食之後之游民作無益以害有益者可勝計哉正義曰器能也因其各有所能供官役吏以廩餼食之如晉文公問八疾胥臣對云侏儒扶廬聾聵司火之類各以器食之扶廬持戟柄也司火主然火也

一曰三農生九穀

九穀黍稷稻粱麻大豆麥苽也周以農事開國故八政以食爲首九職以農穀爲先三農亦曰上中下三等之農

二曰園圃毓草木

毓養也載師以場圃任園地因園圃之民而用之以養毓之職則草木得遂其性矣草葵瓜之屬木桑棗之屬

三曰虞衡作山澤之材

山虞掌山林之政令川衡掌巡川澤之禁令山林川澤之職有聯事也作者作興凡國家用度需材山澤之產爲多虞衡掌其政令識其可用之材作而興之如仲夏斬陽木仲冬斬陰木以至蒯紵菅葛染草之屬無棄物也

四曰藪牧養蕃鳥獸

凡魚鴈狼鹿之屬生藪麓之間牛羊六畜之物在
牧養之數藪則大藪小藪虞人任其事牧則牧人
及養鳥獸之官任其職 鄭鍔曰藪牧之民而在
以養蕃之職則鳥獸不可勝用矣

五曰百工飭化八材六曰商賈阜通貨賄

工者審曲面勢飭財辨器之職飭者致力以治之
化者因形移易以成之八材金木羽革骨角玉石
如飭金則化爲鍾斧之屬爾雅曰珠曰切象曰磋
玉曰琢石曰磨木曰刻金曰鏤革曰剝羽曰析今

本珠作骨

七曰嬪婦化治絲枲

鄭鍔曰嬪有夫者之稱書曰嬪於虞虞舜夫也婦有姑者之稱春秋書伯姬來逆婦伯姬姑也 應

龍曰桑麻屬治絲而化之以爲帛治枲而化之以爲布

八曰臣妾聚斂疏材

聚者收之於此斂者取之於彼疏匱也疏材未飭

治之材鄭鍔曰疏百草根實可食者材薪芻之可委積者此說雖本注疏之言此不取

九曰閒民無常職轉移職事

閒民閒隙之民任己職之外有餘閒可以執他人之事所謂通功易事以羨補不足者 或問九職任萬民劉說亦善劉氏曰九職者任天下之民以九事也頒其職之事則大司徒主之任其民而徵其賦貢則閭師掌之大宰之所掌者域萬民用九職以爲業則普天之下率土之濱無異業之民所以均四海統萬民故無左道以惑衆者無游手以失職者無夷風以亂華者莫不係於鄉閭由於禮義而用中於五品者焉是故無遺一民毋棄一物毋缺一用於天下以九職域其民故也秦漢以降

其民不入於九職者多矣求建其極不亦勞乎
以九賦斂財賄一曰邦中之賦

賦者自上取下之名其別有九財賄與貨賄同

二曰四郊之賦

按四郊去國四面各百里

三曰邦甸之賦

按四丘爲甸出車一乘

四曰家削之賦

王昭禹曰家削家邑稍地

五曰邦縣之賦

邦縣五鄙爲縣

六曰邦都之賦

邦都四縣爲都方五百里

七曰關市之賦

關市市必有關見司關之職

八曰山澤之賦

名山大澤不以封山師川師掌其政令

九曰幣餘之賦

歐陽謙之曰凡財之入於官者皆謂之賦而官貨財物之出入其籍各異其出而爲用也旣載於出

財之籍矣則用餘而復入於官也豈可不又載之入財之籍乎既載之入財之籍安得不謂之賦哉徐筠曰此載師任地所征之賦也鄭氏曰賦者口率出泉後之箕民錢或謂之賦又曰幣餘謂占賣國中之斥幣二說皆非經義豈有九賦而出錢者

以九式均節財用

均平也節爲之防範使無過不及之差九式有一定之常目爲不易之經制以之均財爲有道以之節用爲有禮無有餘之浩不足之暴無豐年之奢

凶年之儉當時皆別其書鄭鍔曰節其一而不節其二節於此而不節於彼非均節也凡事各有式以爲之節是之謂均所謂式者爲之書以記其多寡也

一曰祭祀之式

鄭鍔曰祭祀有天神人鬼地示之殊應龍曰祭先血腥祀尙氣臭其大小有制豐殺有數

二曰賓客之式

賓客先代之後朝聘之禮有親遠新舊

三曰喪荒之式

以凶禮哀邦國之憂有輕重緩急鄭鏐曰喪有賻
賵視其爵等之高下荒有賑救視其災勢之輕重
四曰羞服之式

羞飲食也服衣服也有尊卑貴賤曲禮曰庶羞不
踰牲燕衣不踰祭服

五日工事之式

器物必中度量有精粗廣狹如考工所記式也

六曰幣帛之式

式謂有名物數制

七曰芻秣之式

草曰芻穀曰秣有勞逸遠邇

八曰匪頒之式

王所分賜羣臣之禮如分寶玉頒祀頒禽歸服之類有親有賢

九曰好用之式

好與爲好也玉府曰好賜此如燕勞羣臣兄弟朋友賜玉賜器之類有功有故鄭鍔曰燕好所用者雖至尊用財不可以有司之法拘之亦不可過制以九貢致邦國之用

貢者下奉上之名庶民有田則有賦諸侯有國則

有貢貢亦出於賦故致者至也使之自致而已不
可以徵而求也周官制爲九貢之法令五等侯國
各守常職以貢其所有以爲王國之用度其不在
九貢之法者上弗受也下弗進也歐陽氏曰致邦
國之用乃朝廷所須以爲用而出於邦國者則不
致其無用之物可知矣

一曰祀貢二曰嬪貢

鄭鍔曰祀貢祭祀所貢凡可以交神明之物

三曰器貢四曰幣貢

鏐鏤石磬丹漆之屬凡可以爲用器兵器禮樂器

之物

五日材貢

鄭氏曰材貢樛榦栝柏篠蕩也應龍曰按集韻柅亦作樛夏書柅榦栝柏

六日貨貢

鄭鍔曰貨如金玉龜貝之類

七日服貢

締紵玄繡織纈織皮之類凡可爲服之物

八日旂貢

旂者鄭司農以爲毛羽謂旌旗之末爲旂也康成

以爲燕好珠璣琅玕之屬謂園游之爲旂也或曰
司常旂車載旌以田之鄙以旂爲田獵巡幸之名
如所謂取於相土之東都以待王之東蒐者之類
也應龍謂此當闕疑

九日物貢

如山澤各以其物貢是也

以九兩繫邦國之民

周官九兩之法使兩兩相繫有彼不可無此雖天
下之廣萬民之衆體勢聯屬若系無間然也

一日牧以地得民

牧者牧民之官王制建五等諸侯五國以爲屬屬有長十國以爲連連有帥三十國以爲卒卒有正二百一十國以爲州州有牧各有分地故曰以地得民鄭鍔曰五等諸侯皆有地獨言牧何也蓋牧者諸侯之長諸侯雖有其地苟非八命之牧修方伯連帥之職使之大小相維亦無以保其地何以得民哉

二曰長以貴得民

以官府則有長大事從之尊朝廷莫如尙爵尙爵者古今天下之達道也故曰以貴得民

三曰師以賢得民

師者民之模範也有德行賢於民民從而師之通貴賤以至四民九職必皆有師服勤至死爲其賢也

四曰儒以道得民

儒通天地人之稱有行誼能傳道解惑引民由是而之者 師與儒二者在朝廷則有師民保民之官在閭里則有左右閭師之職 鄭鏗曰古之致仕而歸於鄉里者謂之師儒

五曰宗以族得民

宗宗子也

六曰主以利得民

利者其都邑之民利賴之也泉府曰都鄙之民從其主國人郊人從其有司又大夫之家亦稱主歐陽氏曰民大夫之臣隸也大夫之家臣呼其大夫曰主左傳曰事吳敢不如事主

七曰吏以治得民

吏治其賦者國人郊人從其有司是也

八曰友以任得民

鄭氏曰友謂同井相友助者鄭鍔曰急難之際能

相保任則民不忍棄之

九曰藪以富得民

澤無水曰藪有大中小三等虞人掌之鄭鏞曰澤中水去草生包藏孕育者多民欲其富而不去應龍曰先王之制於藪有虞掌其政令爲之厲禁則其間所生之物充牣繁庶而民足以致富利重而難遷惟土物愛厥心臧也王次黜曰財散則民聚故牧長主吏師儒宗友之後以藪富終焉善治者當務識其大體應龍曰九兩大意與八統相似上一節論治體不以八統馭之則徒法不足以固民

心下節論財用不以九兩繫之則務財不足以得民聚

正月之吉始和布治於邦國都鄙

始和讀連下句正月者以是月爲十二月之長和如四方民大和會百工播民和周書常用此和字周禮以歲終令百官府各正其治受其會聽其致事至王正元會太宰以是日爲始和布治法於天下夫治法之在邦國都鄙固有一定而不可易者然古人平在朔易革故從新其事實繁方一歲之首豈無所當改易害則除之利則興之民之所既

倦則不以困民民之所未安則不以強民將與時
偕行新新而無窮也按周以建子爲正此是正月
元會所行在唐虞三代雖未見元會之文而考之
載籍自有正月上日之文以來莫不從用此日可
推而見

乃縣治象之法於象魏使萬民觀治象挾日而斂之
乃者承上文起下義此正歲建寅之月也縣垂也
治象前所布治之象也又從而畫象其事以明其
法也象魏雉門外東西兩闕也象者謂祖宗以來
垂象於此也魏者當道高巍巍然也挾日從甲至

甲十日一周浹也考周官之法並以建子之月謂之正月以正時王受命之紀而以建寅之月爲正歲以正天運四時之序凡計月之一二必以正歲爲一月也大宰掌邦治旣於正月建子之月以其典籍布之邦國都鄙藏在官府有司守之以時奉行矣又於夏春寅月四時之首萬民畢出之時以前所布之治法畫象其事垂之雙闕之下使臣民皆得觀見其法之形象縣之高則無不見歛之速則無玩詩曰周道如砥其直如矢君子所履小人所視謂其均平洞達無不備也正歲見下小宰文

或問鄭氏以正月爲周正之月正歲爲夏正之月是一年有兩正月而集傳各從其說何也曰周雖改正朔而未嘗改時月周以建子爲正凡大朝會大建立行之於建子之正所謂時王之正也然春夏秋冬乃天運四時之正凡十二個月從古至今未嘗易考之書前乎周者以建丑爲正其書始卽位惟元祀十有二月乙丑以見月未嘗易考之史後乎周者以建亥爲正其書始建國曰元年冬十月以見時未嘗易故周禮經文有正月又有正歲互見於大宰小宰蓋小宰所以佐大宰者也大

宰布治法於建子之月所以明一代時王元會之
正故謂之正月小宰帥屬觀治象於建寅之月所
以明一歲天運時序之正故謂之正歲今以周之
時月考之七月周公陳於成王之詩也曰七月流
火九月授衣則成王時月未嘗改也六月宣王詩
也而釋者曰盛夏出兵則宣王時月未嘗改也四
月幽王詩也而曰四月維夏六月徂暑則幽王時
月亦未嘗改也朱子曰所謂改正朔者以是月爲
歲首耳月固不易也蓋改正朔爲歲首者時王之
正而月固不易者歲有四時所謂十二月之序則

不可紊也故嘗謂自堯典定時成歲之後不特三代無改時易月之事如四時十二月之序乃百世不能改者惟改正朔繫於時王之典各用所改之正以爲正初不嫌於謂正月或者執朱子不改月之說遂疑鄭氏解周禮正月之吉爲周正月則是改十一月爲正月而建寅又爲正月是一歲有兩正月不思朱子固嘗曰三代之正不同夏用人正商用地正周用天正以此推之商用地正則十二月商之正月也周用人正則十一月周之正月也旣曰正矣何嫌於以十一月十二月爲正月乎至

於一歲兩正月之疑以周禮考之經文所以特謂
之正歲此固可見按史唐武后天授元年十一月
朔日南至改用周正以十一月爲正月十二月爲
臘月至正月爲一月武后是時改唐爲周取法周
正則在周十一月不嫌於稱正月而十二月爲臘
月夏正月爲一月凡此者安知武后非據周而改
作乎况周禮正月大宰布治法於邦國都鄙至正
歲而後小宰率屬觀治象而徇以木鐸以先後次
序考之正月正歲之分固已可見兼經文尤有明
白可信者如鄉大夫職云正月之吉受教法於司

徒下文云歲終則令六鄉之吏會政致事正歲令羣吏攷法於司徒以退各憲之於其所治又州長職云正月之吉各屬其州之民而讀法下文云歲終則會其州之政令正歲則讀教法如初故常謂世儒泥執一偏之見率以大宰正月始和爲夏正月其意豈非謂正歲之文見於小宰而大宰乃縣治象之法本文原不曾有正歲二字因以鄭注爲非却不知地官鄉大夫州長二經皆於上文云正月之吉於下文歲終之下又云正歲如此觀之經文三節極爲明白要知正月卽周正之月以十一

月爲歲首也歲終卽豳詩曰惟改歲之月以十二月爲歲終也旣歲終矣又云正歲則是以夏正建寅爲得一歲四時之正凡周人歲首之事又於此時重申之故觀鄉大夫職云正歲憲之於其所治之國則大宰乃縣治象之法其在正月爲可知也觀州長職云正歲讀教法如初則所謂如初者卽是如正月始和之初爲可知也不然經文上下同此一職旣曰正月又曰正歲旣言受法於司徒又言考法於司徒旣云屬其民讀法又云讀法如初此豈同一時之事哉後世儒者於周禮正月例以

夏正爲拘者但參以經文則是是非非不辨而明矣。或問周禮正月之吉與春秋王正月同乎曰正月者周正之月二書所稱其義固同也嘗考春秋書元年春三字是一截書王正月三字又是一截左氏傳曰元年春王正月此說最爲明白不可例以傳不可信非之程子曰周正月非春也只此一言已足以祛千載之惑故觀程子之說有所謂周正月則知周禮經文稱正月之吉是周之正月無疑嘗觀胡文定公謂春秋以夏時冠周月其意蓋謂冬不可以爲春而誤認程子假天時以立

義之說遂謂春秋行夏時以繫年故以春之一字
冠於周正月之上則是春者夏時之春也不思周
以十一月爲正而未嘗以十一月爲春若以夏時
之春爲周正之月則似以冬爲春此決不然蓋周
自東遷以後魯用魯歷國自爲政時亦寢紊以聖
經書法攷之則以十一月爲春者魯之元年也何
以言之魯隱公卽位之歲則周平王四十有九年
也在春秋書法當云王四十有九年正月而書曰
元年春王正月以元年春繫之隱公以正月繫之
王其義昭然可見聖人之意若曰元年者魯自改

元之元年非王之元年春者魯自以爲春非王之
春故曰元年春獨正月則王之正月爾故曰至正
月要知聖人因魯史修春秋書隱公元年春者乃
因魯史之舊文而寓王之二字於元年春之下者
乃出夫子之特筆此說信爲顛撲不破近世儒者
以建寅之月爲氣候始溫和遂以周禮註疏釋正
月建子爲非徒執泛泛一偏之說而未嘗合前後
經文參攷而紬繹之故嘗爲之說曰商以建丑爲
正周以建子爲正而皆用夏時數月則以十一月
十二月爲正未嘗改月者固也然未知春秋書王

正月則以尊時王之正朔周禮云正月之吉則以
出歲首之政令二者皆建子之月此不易之論也
或又問前說始卽位書元祀十有二月始建國書
元年冬十月以證歷代改正不改月是矣獨周公
作六典夫子作春秋乃以周十一月改書正月何
也曰元祀十二月元年冬十月史官書法之當然
也史以年繫月固不可易月以紊四時十二月之
序若周公制禮於每歲舉行元會之儀授時飭典
以建子爲十二月之長故大宰於是月布治所以
昭時王之正則不得不稱正月至夏正建寅之月

乃四時之首爲一歲之正則不得不改稱正歲小
宰於是月帥屬觀象徇以木鐸此正有合於夏書
孟春木鐸徇於路之事夏書徇鐸下文所舉政典
先儒謂政典乃六典之一周之六典蓋因於夏則
周禮正歲徇鐸宣令實遵夏之舊典攷之是月在
夏曰正月在周曰正歲其爲孟春則一也至若春
秋所書王正月寓王之一字於元年春之下聖經
所以著魯公無王之罪其義昭然 或問周公於
周禮改建子之月爲正月而以正歲表建寅之月
然凌人又云正歲十有二月何耶曰於此見周用

夏正數月而先儒月未嘗改之言信矣正歲者謂
夏之建寅爲正十有二月建丑冰堅腹厚之時按
幽七月詩云二之日鑿冰冲冲朱子詩傳謂周禮
正歲十二月令斬冰是也攷之凌人正歲經文故
書正爲政鄭司農云凌人掌冰政主藏冰之政也
於義亦通然以經文上下推之若以凌人掌冰政
爲句絕而下句以歲十有二月爲文則不見周雖
改正建子而用夏正數月乃歷代不易之制故杜
子春謂政當爲正以正歲向下爲義是以註疏皆
不能易其說也

乃施典於邦國而建其牧立其監設其參傅其伍陳其殷置其輔

乃亦更端之辭也典六典也牧牧民之官監監守也王制天子使大夫監於方伯之國國三人梓材王啟監厥亂爲民呂氏曰黃帝立左右監監視萬國建者始初開創之名立者繼有植立之義合三人之益曰參叶五人之助曰伍傅者上下相附著也殷衆也謂衆士也陳則旅衆一體置則可自辟置王制大國三卿五大夫或問正月始和每歲布治縣象以示更新而所謂牧監以至殷輔亦皆

每歲建立設傳陳置之何若是之紛更與曰先王之時其修明法度督責臣下最爲周密故凡正月布治縣象於典則法之不宜者既有以變而新之矣經下文又曰乃施之於邦國都鄙官府此非他有所施也正所以督責夫推行於天下之人蓋謂布於此者欲其施於彼若夫玩法而不治之人大宰已得於歲終受百官致事之時至是豈可恬視而不爲之變置故不得不繼之以建立設置之事也大宰於歲終詔廢置彼自牧長至於殷輔凡不在所廢者則皆在所建立設傳陳置矣牧非世牧

也九牧之牧取諸侯之有功德者爲之非若有國之諸侯得以世其國者監則監諸侯之國者其祿視諸侯之卿其爵視次國之君其祿取之於方伯之地凡此皆有升黜改易待正月而舉行之大宰歲終與公卿共飭國典以待來歲之宜者皆其事也

乃施則於都鄙而建其長立其兩設其伍陳其殷置其輔

長都鄙之長兼二人之力曰兩

乃施法於官府而建其正立其貳設其攷陳其殷置

其輔

凡爲各官之長皆正也凡爲各官之倅貳者皆貳也攷稽也如今官府必有稽攷炤點磨勘之職或曰宰夫鄉師肆師之屬凡任稽攷之職者皆謂之攷餘同上又按此以上三條曰施典施則施法是布治之大綱曰邦國都鄙官府是施行之次序曰建牧建長建正之屬是分職之大概鄭鑄曰上言布治謂治道隨時之宜每歲有更革所以通其變此又云施典施法施則者邦國都鄙官府所守一定之制久而不易者也

凡治以典待邦國之治以則待都鄙之治以法待官府之治以官成待萬民之治以禮待賓客之治

凡者其目不一發凡於此歲首布治施之於彼者歲終受會以待之於此典必合於典則必合於則法必合於法也官成在人法禮在六典民則邦國都鄙皆有民而有閒田公邑之民王者使吏治之者不在典則之中而在官成之法賓客者先代之後王以賓禮接之雖治法同在邦國之典而待之之禮則異於諸侯羣臣故二者別出之 又按周官職文蓋載未盡者皆於後稱凡以總之諸稱凡

之例始此

祀五帝則掌百官之誓戒與其具修

五帝五方之帝春官兆五帝於四郊是也太昊炎
帝黃帝少昊顓頊食焉誓戒其所當戒者具者牲
牲器皿之屬修者飭治掃除之類掌者掌其法而
其事則有司者治之秋官條狼氏之職凡誓執鞭
以趨於前且命之誓僕右曰殺誓馭曰車轅誓大
夫曰敢不關鞭五百誓師曰鞭三百誓大史曰殺
誓小史曰墨

前期十日帥執事而卜日遂戒

此上文誓戒目

及執事眡滌濯及納亨贊王牲事

贊助也亨熟之也及納牲受亨之時贊迎牽殺獻之事毛血爛腥熟之等

及祀之日贊玉幣爵之事

自眡滌濯已下至此所謂具修也

祀大神示亦如之享先王亦如之贊玉几玉爵

玉几所以依神天子左右玉几宗廟獻用玉爵特

言玉几玉爵者天地五帝不用者何無飾也

無褻也

大朝覲會同贊玉幣玉獻玉几玉爵大喪贊贈玉含

玉

會無常期謂若諸侯有不順服者其順服之國皆

以師來助王討之而曰會也同者謂如上卽位始

建諸侯及王十二年不巡守則諸侯皆來朝而曰

同也 鄭氏曰贊助也玉幣諸侯享幣也玉者圭璋璧琮

琥璜幣者馬皮帛錦繡黼玉獻諸侯獻國珍異亦執玉以致之

如來獻其琛玉几立而設几優尊者也凡大朝覲

之類是也玉爵禮諸侯之酢爵王朝諸

席次席左右玉几玉爵禮諸侯之酢爵王朝諸侯禮之於阼階上謂上公再裸而酢侯伯一應龍

曰按朝覲會同之禮其事則大宗伯相之其細者
司儀大小行人等掌之大宰惟助王受此四者而
曰大朝覲會同此非常之禮也 朱氏曰覲是正
君臣之禮較嚴天子當依而立不下堂而見諸侯
朝是講賓主之儀天子當宁而立路寢門之外
相與揖遜而入

作大事則戒於百官贊王命

國有大事若軍旅之事之類戒飭百官有司則助
王爲教令若書曰周公以王命誥鄭鏗曰作者創
始而爲之贊助則助之以言叙述王意以啟迪之

也

王旼治朝則贊聽治旼四方之聽朝亦如之

聽聽斷也四方之朝王出巡狩諸侯於方岳之下
及六師在外亦有視朝聽斷之事

凡邦之小治則冢宰聽之待四方賓客之小治

凡者其事不一總括不盡故言凡以該之例始於
此六典言佐王八柄二統言詔王此治之大者非
大宰之所得聽也惟邦之小治冢宰得以專決四
方賓客之來其治之小者亦得以自待之 鄭鍔

曰治之大者不稟於王則嫌於專朝廷之權治之

小者不聽於冢宰則無以重大臣之權姚崇爲相
常於帝前叙進郎吏帝以爲我任崇以政大事吾
當與決至用郎吏崇顧不能重煩我耶此亦以重
其權也

歲終則令百官府各正其治受其會聽其致事而詔
王廢置三歲則大計羣吏之治而誅賞之

歲終十有二月百官府非特治官之屬凡百官有
司皆在焉治者有司之職會者宰夫司會之事聽
者大宰之法廢置者王所柄執之權按廢置二義
一爲官職一爲政事蓋布治所以端始正治所以

成終此月令天子與公卿共飭國典之時也一歲之終將會計之先先戒令之使凡百官府各自正處其治狀各從有司者會之會之而致其功狀則聽而平斷之以告於王而行廢置之法明始終之條理體統之崇卑周官之制自縣象至正治受會皆先事而教有忠厚百官之意無不戒視成之暴周官凡所施行皆如此 又按三歲則積歲終之會者三聽者三廢置者三而大計之三有功而不怠三有過而不改則誅者誅賞者賞此不言詔王者歲終詔王則三歲之大計可知按虞書三載考

績三考黜陟幽明至成周時其事寔繁而其法亦
詳矣 或問周官歲終受會三載誅賞較以唐虞
三載考績三考黜陟得無責效之太速與曰考課
之法急之則詐僞生寬之則功實見待之以久則
在職者安心展布以見其能此唐虞三考之法固
善也而亦由當時朝無佞位百僚師師故可須之
以久所謂考績不過時加警策以作其怠爾至若
三考黜陟則流放止於四罪而臯陶稷契皆終其
官不徙其在所陟者亦惟爵服之加而已此唐虞
廣大氣象與王者固不同世降而王才不逮古夏

商官倍至周而才益難若不皆得其人必待九載而黜陟則貽害多矣此成周歲終受會三歲計治所以爲百代不刊之典然周公之制不徒受會而必詔廢置不徒計治而必行誅賞豈若後世具文故事受成於歲終考滿於三載姦人得矯飾以肆其欺善人不得積久以精其職徒見夫指瓜以待熟循級以俟遷姦要以格而已

周官集傳卷一終

此其善人不能欺及凡其善人及夫善人及也

善人受欺凡其善人及凡其善人及夫善人及也

善人受欺凡其善人及凡其善人及夫善人及也

善人受欺凡其善人及凡其善人及夫善人及也

善人受欺凡其善人及凡其善人及夫善人及也

善人受欺凡其善人及凡其善人及夫善人及也

善人受欺凡其善人及凡其善人及夫善人及也

周官集傳卷二

元 毛應龍 撰

小宰之職掌建邦之官刑以治王宮之政令凡宮之糾禁

鄭鏐曰小宰以中大夫二人爲之大宰之貳也

應龍曰小宰爲十二小卿之首掌者職所專主也

建邦之官刑者自立國以來之法卽王宮之政令

與凡宮之糾禁是也王宮有禁衛官府次舍庖膳

醫藥酒漿貨賄徒役之政令政者出入功緒廩稍

之等令者作止期會告戒之事糾以察其隱匿禁

以止其邪刑如儀刑之刑不專以刑罰言也太宰
總馭內外之官府爲一小宰則與內宰對掌王宮
王內之政令有內外之異至宰夫掌治朝之法則
又王宮政令之一事也此長貳之分別也 陳君
舉曰按大宰之屬小宰掌外治凡與王左右親習
之官隸焉

掌邦之六典八法八則之貳以逆邦國都鄙官府之
治

大宰正月布治施六典於邦國施八法於官府施
八則於都鄙其書之副小宰掌之至歲終上計則

各以其副迎受而考其同異凡施以典者逆以典
施以法者逆以法施以則者逆以則典必合於典
法必合於法則必合於則然後謂之治

執法之九貢九賦九式之貳以均財節邦用

歐陽謙之曰執者有一定不可移易之意 應龍

曰貢賦致其均式用有其節凡六典八法八則之
治治在大史者大史逆之治在司會者司會逆之
治在小宰者小宰逆之三官之所逆大宰仍以典
法則待其致事待者舉其綱逆者詳於目九貢九
賦九式之治大宰所制小宰佐之司會計之大府

受其成法而出入之也

以官府之六叙正羣吏一曰以叙正其位二曰以叙
進其治三曰以叙作其事四曰以叙制其食五曰以
叙受其會六曰以叙聽其情

前云以入法治官府此云以官府之六叙正羣吏
吏卽庶人之在官者冢宰有禮絕之敬正者先尊
後卑各依秩序位者朝位治者職業事者功叙條
目食者邑祿稍食會者成計歲會計情謂辭訟情
實聽斷之時各以其序自此以下六叙六屬六職
六聯八成六計凡六條卽上文所謂典法則貢賦

式之貳也又曰吏之說不一或以爲自大夫以下或以爲士以下或以爲總六屬之吏鄭鍔因大計羣吏之文欲并卿以上言之攷諸經之冢宰以八則治都鄙而有官府之分秋官三刺之法有羣臣羣吏萬民之別官與吏不同名臣與吏不同位故大宰曰馭羣臣小宰曰正羣吏自有截然之辨陳氏曰六叙在前六計在後此是攷課法中間皆是官吏事有尊卑有先後有緩急以叙正其位者定尊卑也治者功狀也謂如今日朝諸侯且先遣諸侯奏功狀其它不滾在這裏以叙作其事者謂如

居官集傳卷二
三
今日理會朝諸侯事則朝事在前其他在後今日
理會祭祀便是祭事在前其他又後爾制其食亦
有叙如聽其情須是一人聽了一人再說纔是有
體統朝廷上將六叙去區處百官便有六計去察
他今一人善便察得見他如此善各各察他自然
無遺材

以官府之六屬舉邦治一曰天官其屬六十掌邦治
大事則從其長小事則專達二曰地官其屬六十掌
邦教大事則從其長小事則專達三曰春官其屬六
十掌邦禮大事則從其長小事則專達四曰夏官其

屬六十掌邦政大事則從其長小事則專達五日秋
官其屬六十掌邦刑大事則從其長小事則專達六
日冬官其屬六十掌邦事大事則從其長小事則專
達

賈氏曰六屬舉邦治者謂官盛任使 應龍曰官
盛任使所以敬大臣也凡官各有屬而屬各有長
達猶行也大小者指事之體而言大事雖略而所
繫者重必從其長小事雖繁而所繫者輕亦得專
達六官之屬皆曰六十舉成數爾

以官府之六職辨邦治

六職與六典之文若相近似而義有不同六職無
官府一節蓋是以官府所守之法爲職也自邦國
萬民之外又各舉官府之一事以明小宰職之所
當治者切而財用遠而賓客明而百物幽而鬼神
隱而盜賊無不揆之有道治之有法其職辨其治
亦辨矣 鄭鏐曰小宰六職言邦國萬民而獨不
言官府蓋所謂治職者官府之治也教職者官府
之教也禮政刑事則官府禮政刑事也
一曰治職以平邦國以均萬民以節財用
均者致其平在下則言均在上則言節

二曰教職以安邦國以甯萬民以懷賓客
甯則雖有不安者亦置之安懷亦安也田野闢道
路通廬宿候館各有委積

三曰禮職以和邦國以諧萬民以事鬼神
禮主和而後鬼神享

四曰政職以服邦國以正萬民以聚百物
四方無虞萬物各由其道

五曰刑職以詰邦國以糾萬民以除盜賊
詰之使不容奸糾之使不爲非國不容奸民不爲
非則盜賊除矣

六曰事職以富邦國以養萬民以生百物

居四民時地利春秋傳曰時以作事事以厚生

以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯

祭血祭祀禋祀享先王亦曰祀祭祀吉禮喪喪禮荒荒禮軍旅田役皆軍禮田以簡衆役以任衆斂者斂民之財弛者弛民之力 鄭氏曰荒政弛力

役此六聯合治者如大祭祀大宰贊玉幣司徒奉牛牲宗伯奉玉鬯司馬羞魚牲奉馬牲司寇奉明

水火之等謂祭祀之聯也餘小事亦皆有聯凡六
官之屬各與其六十屬之同官爲聯各官亦自爲
聯謂膳夫之屬庖人內外饗亨亨人自爲聯酒正
之屬酒人漿人爲聯而膳夫酒正又各以其事爲
聯又如膳夫上士二人爲聯中士四人爲聯下士
八人又爲聯府二人聯史四人聯胥十有二人徒
百有二十人又自爲聯聯則有合而不散之義惟
聯故合也

以官府之八成經邦治

八成卽大宰八法官成之貳也官成所以待萬民

之治於事爲詳然各有舊章品式可依據行之凡民物之數簿書圖籍之事皆一定而不亂者

一曰聽政役以比居

比居者猶五家爲之比並居相次各有伍籍凡聽賦役使之事則以地之比居爲據

二曰聽師田以簡稽

師所以用衆田所以簡衆簡者閱而選之稽者計而考之

三曰聽閭里以版圖

有民人之事則以民數之版聽之有土地之事則

以地域之圖聽之猶今保伍之政

四曰聽稱責以傅別

稱如孟子云又稱貸而益之之稱責者責其所償
傅者朝士所謂地傅謂若將來亡其人則指其地
爲證別謂以一札破而爲二所謂凡有責者有判
書以治則聽

五曰聽祿位以禮命

鄭鍔曰禮則國家宮室車器衣服之儀命則一命
至九命之數可以斷其祿位之所當得 應龍曰
祿如卿祿四大夫大夫倍上士之祿位如卿一位

大夫一位之位禮者數命有等如九儀九命之等
凡授祿賜位以此爲之制

六曰聽取予以書契

書契各執其一予者執左取者執右合而驗之以
行其取予凡曰別曰契皆要也稱責謂別則其用
以別爲主取予謂契則其用以契爲主

七曰聽賣買以質劑

賣買商賈之治釋者曰長曰質短曰劑地官質人
之職曰大市以質小市以劑案質者立之佐而人
爲之徵劑者前後作二契於中央破之兩家各得

其一皆無手所書字異於傳別也夫結繩作而有書契書契不足而有質劑質劑不足而有傳別此取予賣買稱責三者所用有輕重大概契憑書爲信劑憑人爲質別憑地爲傳也 鄭鍔曰長曰質短曰劑者以所期久近言之也大曰質小曰劑者以所約多寡言之也

八曰聽出入以要會

出謂給以用者入謂受而藏之者月計曰要歲計曰會凡財物之出入聽之以月終之要歲終之會又按以上八成之物皆文籍也政役師田閭里稱

責祿位取予賣買出入入者爲定名所謂常也比
居簡稽版圖傅別禮命書契質劑要會八者爲徵
驗所謂成也簡稽禮命要會用於公者比居版圖
傅別書契質劑官民皆用之非有司法守之嚴凡
民何所措其手足

以聽官府之六計弊羣吏之治一曰廉善二曰廉能
三曰廉敬四曰廉正五曰廉法六曰廉辨

以聽官府之六計者以上八成聽政役聽出入之
治而著其治狀曰官計凡六條目也弊止也斷也
猶言治狀之止處也廉察也善有淑德孟子云可

欲之謂善能者能行政令敬不懈於位也正無傾
邪也法守法不失也辨者事至能斷不爲物所惑
亂也舊謂六事以廉潔爲本非也豈有敬正而貪
能守法而不潔已者弊羣吏之治而云廉猶上文
經邦治而云聽也

以法掌祭祀朝覲會同賓客之戒具軍旅田役喪荒
亦如之七事者令百官府共其財用治其施舍聽其
治訟

法者法官之成法也令百官府者戒也共其財用
者具也治其施舍者施其所當施舍其所當舍也

舍謂國中有貴者賢者服公事者老者疾者在所
舍也凡事嚴而不辨財用而不給施舍之不當而
有治訟治者在所理訟者在所爭皆小宰受而聽
之

凡祭祀贊玉幣爵之事裸將之事

玉幣爵三者以禮神王祀五帝則大宰贊王小宰
復助大宰以贊也裸用鬱鬯祀先王所用將則用
瓚裸者王所以酌鬯於圭瓚之事將者人臣持以
灌於地之事王親酌灌所以致敬昔者商人尊神
交於明故先樂而求諸陽周人尊禮交於幽故先

裸而求諸陰凡祭鬯人共秬鬯鬱人共裸器者入鬱草以和鬯酒祀天地則陳而不裸祀先王則有裸將之儀與其節大宰無裸將文互見於此

凡賓客贊裸凡受爵之事凡受幣之事

助冢宰贊此三事王待賓亦有裸以事神之道交之敬之至也

喪荒受其含禭幣玉之事

含禭所以贈死者王喪諸侯有致含禭幣玉之事凶年諸侯亦有致幣玉之事受者小宰專受之以復於上太宰無荒禮之文互見於此

月終則以官府之叙受羣吏之要贊冢宰受歲會

小宰宰夫職文並以專達者居前從長者居後如
官刑所專典式所從月要所專歲會所從

歲終則令羣吏致事

大宰則令百官府此則令羣吏歲終季冬十有二
月也既於月終以叙受其要又於歲終以叙受其
會先令後受使無違慢

正歲帥治官之屬而觀治象之法徇以木鐸曰不用
法者國有常刑

正歲建寅之月得四時之正以成歲功也治象之

法大宰所縣於象魏者也帥其屬則易從官從而
民可知徇警之切也木鐸金口木舌國有大事則
振之以警衆也縣之魏闕則有日者無不見徇之
木鐸則有耳者無不聞每歲孟春必觀象徇鐸以
儆動萬民之耳目於觀感之下人事成功於此乎
履端率作也夫治官之法大宰既懸象以示之小
宰乃以身而率之帥者喫緊致詳蓋有取於耳目
聲色之外而敷求於躬行踐履之間聖人慮或帥
之而不從徇之而不知則又申之以辭命曰不用
法者國有常刑常刑者一定不易之刑也仁聲善

周官集傳卷二
教反覆詳蓋其著於人心者深矣按太宰有正月
之文小宰變文曰正歲同是建寅之月以觀象之
事足徵也蓋太宰布治而縣之小宰帥屬而觀之
自是同時之事非有先後之異凡經中變文之類
放此

乃退以宮刑憲禁於王宮

乃者亦更端也退者既徇而退也宮刑者職首所
掌也禁禁之使不犯也治外不遺內舉遠不忘近
正歲縣治象於雉門之外宮中有不見者故縣象
徇鐸之次以宮刑表縣之於宮中

令於百官府曰各修乃職攷乃法待乃事以聽王命
其有不共則國有大刑

職如醫師醫爲職膳夫膳爲職法成法也待其事
者若徵令復逆其來無常者皆曰待也君命無俟
苟有聽聞而不共於此三者則用大刑此曰大者
君親臨之宜莫大焉

宰夫之職掌治朝之法以正王及三公六卿大夫羣
吏之位掌其禁令

宰夫掌凡攷之事下大夫四人爲之法爲位次禁
令謂若王南面三公北面東上卿大夫西面北上

羣吏在其後之位禁之使不干於法令之使不愆於禮

叙羣吏之治以待賓客之令諸臣之復萬民之逆

法者朝位禁令治者待令與復逆之三事此三條皆宰夫職之總名目凡夏官司士大僕小臣秋官小司寇朝士司儀之屬所掌皆掌其法而叙其治事令者令於下也既掌治朝之法於王日聽朝則正其位賓客朝聘莫先焉故敘致其令也先賓客而次羣臣之復如說復於王之復也報之義也羣臣羣吏之次州長眾庶皆在焉故次以萬民使咸

得通達其情無壅蔽也

掌百官府之徵令辨其八職

官則有正師司旅府史胥徒之名府則有治要治
凡治目治數治藏贊治治序徵令之所掌辨者上
徵某人則辨曰某人爲某官上令某事則辨其某
事在某府或以名舉或以叙及各致其辨無迷亂
也

一曰正掌官法以治要

正各官之長其屬之所取正譬於治官則冢宰教
官則司徒也法如治官則治法教官則教法也要

者事之綱治之總會處也

二曰師掌官成以治凡

官必有師如宰夫鄉師之屬成者成事品式物之
模範凡者分總眾條之名 項安世曰官成卽日
成月成歲成

三曰司掌官法以治目

司者有司若宮正宮伯以下各治一職行一司之
事法如膳有膳法醫有醫法酒有酒法之類 王
昭禹曰一官有一官之法目如綱之有目官長分
其事而與之治司乃治其一條一目

四曰旅掌官常以治數

旅者衆也如旅下士之屬旅則遵奉故常視例而已

五曰府掌書契以治藏

契者憑驗如酒正云凡有秩酒者以書契授之是也凡府之事非契不行

六曰史掌官書以贊治

鄭錡曰史主文書者 歐陽謙之曰書契以後天下之事紀錄之浩繁文移之往復記古昔之嚆嚆傳千里之恣恣要豈小補八職獨史稱贊治良有

以哉

七曰胥掌官叙以治叙

掌大小之職尊卑之次叙

八曰徒掌官令以徵令

正當也長也師眾也貳也司者有官府之名目爲各屬之長旅者百執事之屬各任所執之事司與正同爲長而大小不同師與旅同爲眾而上下有異要與綱目爲數是凡之目府庫非契不受政令非書不行契者得其凡要書者詳其數目才智可爲胥則發施有叙役使謂之徒則走趨視令已上

三節言掌治朝之法則與小宰掌治王宮之政令
爲有等言叙羣吏之治稱羣吏則避尊者言掌百
官府之徵令稱叙及徵令則胥徒之事此宰夫職
之所得專達者以下四節掌治法式法之吉賓弔
喪之禮歲終之法正歲之法皆是爲天官之攷而
從其長之事

掌治法以攷百官府羣都縣鄙之治乘其財用之出
入凡失財用物辟名者以官刑詔冢宰而誅之其足
用長財善物者賞之

治法大宰治官之法攷者會稽勾攷之也掌其法

以攷其治都縣鄙三等采地羣者概舉之也六遂
五百家爲鄙五鄙爲縣四縣爲都乘猶計也算法
乘除之名始此財有物用有名辟名者謂以虛爲
實指甲作乙書契財物不相應也足用者用度不
闕謂不失財也長財者長猶養也謂蓄藏有法善
物者善無惡也謂納受不苟乘其財用之出入者
所掌治法在此也於失財足用二者攷見百官府
羣都縣鄙之治狀以告於冢宰視八法之官刑而
誅賞之舊說財泉穀也用貨賄也物畜獸也雖於
財用物三字爲順而上文旣單言財用則財爲財

物用爲用度其出入之義自明故不取舊說

以式法掌祭祀之戒具與其薦羞從大宰而眡滌濯
式法九式之法戒具見太宰掌者非掌其物也掌
以法攷其如式不如式爾從大宰而眡滌濯以式
法贊大宰也

凡禮事贊小宰比官府之具

凡五禮之事皆助小宰比校百官有司之所共具
此事之應攷而非職之所專達則執其式法贊小
宰而爲之攷

凡朝覲會同賓客以牢禮之法掌其牢禮委積膳獻

飲食賓賜之殮牽與其陳數

牢有飪有腥有牽委積於賓客道用者禾米芻薪
之等膳食之善者獻禽獸也飲食者享食之禮如
公食大夫之食殮食也春秋傳曰殮有陪鼎是也
牽餽牽也謂牛羊之屬生致者陳者陳設數者品
秩數目牢禮者總名也在道曰委積致館曰膳獻
既聘有飲食贈送曰賓賜此皆行人掌客之職宰
夫掌其禮以其式法而致之無過不及 或曰牢
禮王饗諸侯之禮按經曰王合諸侯而饗禮則具
十有二牢庶具百物備是也其具曰牢禮委積曰

膳獻飲食曰賓賜之殮牽賓賜者好賜也唯其膳
獻以事君故下文又起意賓賜掌客掌四方賓客
之牢禮餼獻飲食之等數凡諸侯之禮上公五積
皆眡殮牽三問皆修羣介行人宰史皆有牢殮五
牢食四十簋十豆四十鉶四十有二壺四十鼎簋
十有二牲三十有六皆陳饗餼九牢其死牢如殮
之陳牽四牢米百有二十筥醢醢百有二十饗車
皆陳車米眡生牢牢十車車乘有五簋車禾眡死
牢牢十車車三秬芻薪倍禾皆陳乘禽日九十雙
殷膳大牢以及歸三饗三食三燕若弗酌則以幣

致之凡介行人宰史皆有殮饗餼以其爵等爲之
牢禮之陳數唯上介有禽獻夫人致禮八壺八豆
八簋膳大牢致饗大牢食大牢卿皆見以羔侯伯
以下以是爲等

凡邦之弔事掌其戒令與其幣器財用凡所共者

弔謂以弔禮哀禍災者戒所當共令所當具幣帛
器具財貨用物凡所必有者皆共之

大喪小喪掌小官之戒令帥執事而治之三公六卿
之喪與職喪帥官有司而治之凡諸大夫之喪使其
族帥有司而治之

有司羣吏也

歲終則令羣吏正歲會月終則令正月要旬終則令正日成而以攷其治治不以時舉者以告而誅之

鄭鏐曰總一歲之治者謂之會會言合聚之衆也
總一月之治者謂之要要言綱領之詳也總一旬之治者謂之成成言事緒之就也 應龍曰治者職業也會要成三者皆當攷攷歲會以歸之大宰攷月要以歸之小宰若日成則已職之所專理以日成旬以旬成月以月成歲其有歲終而不成歲會月終而不正月要旬終而不正日成雖有治狀

謂之不時令之而不飭於治攷之而不協於正雖以時至謂之不舉不時舉者以告於治官之長而誅責若後世之違時令失期會者也令之而後攷不徒攷也不時舉者誅之不徒令也

正歲則以法警戒羣吏令脩宮中職事

正歲孟春之月小宰帥治官之屬而觀法徇以木鐸以宮行刑憲禁宰夫贊其事以法警勅羣吏之職班令使修宮中之事宮中之事本非宰夫之職特以正歲助小宰施令而已

書其能者與其良者而以告於上

能有道藝而見於事者良有德行而見於事者書
謂記其姓名某也能某也良告謂以所書之姓名
又告於上以俟他日擢用夫如是小大之臣安得
不咸懷忠良也

宮正掌王宮之戒令糾禁

正者宮官之屬於是乎取正凡言正者皆其屬官
之所就正也王宮對王內言之也戒儆戒令命令
糾察糾禁防禁此一節是其所掌之綱 劉氏曰
飭人以畏慎之謂戒齊之以遵守之謂令誥之以
過差之謂糾遏之以違犯之謂禁斯其所掌也

以時比宮中之官府次舍之衆寡

比者以此校彼此之欲其均也官在王宮者府者
司存次者掌直舍者其所居寺也衆寡者名物之
數也次舍有定處衆寡有定名其比較有定法如
春秋潘崇掌環列之尹如漢光祿勳諸郎謂之郎
衛職衛尉主衛士謂之兵衛職 或問宮正所謂
官府之在王宮者得非治職於王宮以給宿衛與
曰劉氏之說亦善劉氏曰宮內而有官府者奉上
之物用有不可以遠者如膳夫宮伯庖人內饗玉
府之類是也次謂八次所以待宿息也舍謂八舍

所以待休沐也皆在宮中其人有時而衆寡不同
故時其增減而殺之 胡仁仲曰先王之制凡官
府次舍列於庫門之外所以別內外嚴貴賤也今
宮正乃比宮中之官府次舍之衆寡又曰去其奇
衰之民則是妃嬪與官吏雜處而內外亂矣殊不
知宮正所掌者宮中徒役之民與典婦功典絲典
臬染人履人等官皆士人也皆有室廬官署在內
雖在宮中不應與妃嬪雜處漢郎吏舍衛士廬周
匝殿內自後世而觀亦豈與妃嬪雜處蓋此有兩
項一項是公卿大夫士之子弟國子貴游爲之分

置八隅宮伯領之所謂掌王宮之士庶子至投入
次八舍之職是也一項是官府之在宮中徒役爲
之錯置於士庶子八次八舍之職間環衛於區廬
以周王室宮正領之所謂掌王宮之戒令糾禁至
教之道藝是也大抵兩項人皆是環列之衛至於
人主切身侍御僕從却令掌於大僕而屬於司馬
故宮伯所掌在漢時所謂郎衛宮正所掌在漢時
所謂兵衛固悉領於大宰至春秋時尤存其制如
潘崇爲大宰掌環列之尹是也 陳君舉曰漢制
猶有周官遺意以衛尉教衛兵如周官宮正之職

以光祿勳掌郎從宿衛如宮伯之職而大司馬以三公都試卽從羽林兩衛城門宮衛北門軍兵屬焉近周制宮正宮伯之權統於小宰矣爲之版以待

此以上是宮中職之要

夕擊柝而比之

二木相擊以示儆禁若後世之更點者

國有故則令宿其比亦如之

故者事之適至非常事也令者以其故命於在版者宿者宿衛宿衛常事於有故而特云令宿何也

周官集傳卷二
三
常事則番休更直有故則百官有司皆在焉如文
王世子云諸父守貴宮貴室諸子諸孫守下宮下
室是也比者比其人之在否

辨外內而時禁

辨外內外不干於內內不交於外時禁如擊柝在
夕振木鐸在春秋夜行則以燭之類以上是戒令
糾禁之節

稽其功緒糾其德行幾其出入均其稍食

治職業者已成見功未成見緒緒者成事之端也
稽之以儆其怠慢糾之使無差慝幾同察也幾其

出入之迹慎作止也均則無貧餼稟稱事所以勸也四者之序先其事而後其食所以教也或曰稽其在官之功緒以糾其德行幾其名籍之出入以均其稍食

去其淫怠與其奇袤之民

去者去其惡使不爲使之不爲是卽去也淫過也過則侵官怠慢也慢則曠職稽而得其功緒之淫怠察見其出入之奇袤則去之以上一節是戒令

糾禁之目

會其什伍而教之道藝

會計也道者應事接物各有當行之法猶道路也
藝如禮樂射御書數之類會其什伍者比其眾寡
之目也二伍爲什則比於眾五人爲伍則比於寡
比亦附也教之道藝不徒會也會而計之使得有
比以相從更番上直遞休入學學在公宮南虎門
之左教有師保氏之官而宮正之戒令糾禁行焉
書曰綴衣虎賁克用常人爲其常有常心也侍御
僕從罔匪正人有以導之正道也

月終則會其稍食歲終則會其行事

月終則會以求月成歲終則會以攷歲成月會稍

食不月會則失出入之實歲會行事通一歲則見
功狀之完稍食行事者互見其文會其行事不徒
食也會其稍食以稱事也此一節是以比之目

凡邦之大事令於王宮之官府次舍無去守而聽政
令

大事如小宰七事之屬無去所守守其常也無敢
去者以從政也聽政令者無敢後也聽而後行無
輕動也

春秋以木鐸脩火禁

春秋二時大火出入之候春火將出則以木鐸徇

於王宮之官府次舍使因火之出而有脩治焉懼其始出而暴怒秋而火入則又以木鐸警之使因火之入而有脩治焉懼其入而有餘烈鄭司農以讀春秋以木鐸脩火句禁凡邦之事蹕按云季春出火此用木鐸當時孟春脩者預爲之防也

凡邦之事蹕官中廟中則執燭大喪則投廬舍辨其親疏貴賤之居

凡邦之事合上文有故有大事言之也凡國有事而動官衆事在外則鳴蹕以止行人嚴清衛事在官中廟中則執燭以察幽隱備非常此上皆時禁

之目也 徐筠曰宮中掌王宮之戒令糾察自宮
正至掌次凡三十官此王宮之官也內宰掌王內
之政令自內宰至夏采凡十九官此王內之官也
大府至掌皮凡十一官亦隸於王宮而皆總於大
宰掌財賦出內之官也

宮伯掌王宮之士庶子凡在版者

鄭鍔曰士謂諸吏之適子庶謂諸吏之庶子 應

龍曰伯亦長也士庶子者公卿大夫元士之適子

庶子入衛王宮學以授其世業者管子曰處士於
官府是也版猶名籍凡在版者謂在王宮又有公

旅之正室支庶有國子之賢者能者有庶人之在
屯衛者執技能者給役使者皆著其籍

掌其政令行其秩叙作其徒役之事

政令者行其秩叙作其徒役之事也徒衆也所謂
公徒役趨使也諸解俱以作徒役之事爲太子所
用役自是諸子之職已上是職之綱凡諸官職首
一節皆是提一官之大要

授八次八舍之職事

次者執掌所直舍者宿衛區分次如次於陘之次
舍如舍於郊之舍鄭司農以在內爲次在外爲舍

皆是約而言之卽如康王卽位八人立於門堂階
垂可見八次之大略如漢掌張衡云兵衛八屯可
見八舍之遺意八次八舍之人各有所任之職所
執之事宮伯授之爲行其秩叙之事也

若邦有大事作官衆則令之

此作其徒役之事也

月終則均秩歲終則均叙以時頒其衣裘掌其誅賞
秩者以位制祿均秩所以佐官正之均其稍食也
叙者才氣等第也均叙佐官正之稽其功緒也官
伯月終歲終則均之官正月終歲終則會之均者

乃齊整焉以待其會也夏時頒衣冬時頒裘若後
世之賦冬夏衣也 賈氏曰賦班也官正會其行
事官伯行其誅賞誅賞者大宰之法小宰所掌建
國之宮刑於此而行之也

周官集傳卷二終